

CAHAYA ISLAM

Manusia zaman purba di alam semesta
meraba-raba ibarat buta kehilangan tongkat
benda kaku disembah puja merata
tahyul berselerak turut membuta tekad
pertempuran kejam menjadi-jadi bak air mandi
darah bersemburan- mayat bergelimpangan
Si Perkasa bermaharajalela, memperkosa-menekan
Si Kaya menindas, Si Miskin terjerumus, terkandas
di masa insane meraba-raba tapak tangan tak nyata

Tiba-tiba fajar menyinsing, bersama-sama Muhammad
lahirlah Islam dengan lambang al-Quran
Nur Muhammad- kebenaran mulai membalam
tegak perkasa- membuka langkah percik sinaran
suara azan berkumandang di bawah kolong langit,
alam Islam mencapai kemenangan!.....

Di zaman sendu terbayang di jiwa, memberi keinsafan
mari bersama menutup Kaabah- Lambang persatuan Islam
mari bersama kuburkan semangat, kuatkan tenaga,
pegang teguh tali Tuhan!

Mari bersama membentuk bakal lunas
supaya perahu kita laju dan kemas
mari bangun menyiram tunas
supaya hidup bernas!

Mari bangun menggembur- membaja akar
supaya pokok subur- musuh sukar
Bangun! Bergerak, beransur
mana lemah dipapah mana menghalang dipapah
.....jangan peduli
serahkan kepada qudrat Ilahi!

Bangun! Jangan bertangguh jangan gentar
pegang tali Allahuakbar!